



Tir Yimiyim



TAPAK 3 Yangia anidakangma : **f Tir Yimiyim** **tiyimyim@aolima** **tiyimyim** **TAPAK 7**

Taoba CM Raman Chhattisgarh assembly speaker kumogo

www.tiryimiyim.in

Regd. No. RNI. NAGAAO/2004 / 13113. Postal-NE/RN-717.

e-mail : tiryimiyim@gmail.com

Red Sea nung Houthi telungpuri timtem agütsüba nokdangtsü US-i sangdong



VOL. XXI NO. 73 (ADOK 73) DIMAPUR RASEMNÜ (WEDNESDAY) LUCHII (DECEMBER) 20, 2023 ₹ 5.00

Agriculture Directorate Building lapokogo 2024 Lok Sabha Elections nung 'Modi Vs Kharge' asütsü akok

Kohima, December 19, 2023 (TYO): Agriculture Advisor Mhathung Yanthan-i Mongulbarnü Agriculture Directorate Building tasen lapoktsüogo.

“Department-i office tasen yangluba atema tenüngsang agütsür aser iba office tasen ajanga ketdangsurtem aser staff tsüngda külemi inyaksangshiba sobaliba adoktsü aser takok tuluba angutsü imlar” ta Advisor Yanthan-i ashi.

Paisa ketdangsurtem aser staff dang bendang agütsütsü aser pei mapa nendaka inyaksü ayongzük.

“Agriculture department-i mapang talangka nungi aginüa aruba office tasen asangsang nung nguogo” ta Agriculture Production Commissioner R. Binchilo Thong-ia ashi.

“Iba ki ya kum ter shi agia yanglu saka capital complex area nung directorate building aliba ajanga Directorate aser Secretariat tsüngda amalitep tajunga lia mapa inyaka otettsü” ta pai ashi.

Paisa staff dang aluyimertem aser Nagaland state ajungtsü atema telemetbatem agia mapa inyaksü ayongzük.

“Office tasen ya ali tasazük 39,878 sq.ft. nung Rs. 15 crore endoka yanglu. Azüklen menden trok amentepa atuba ki nung takdang 60 lir” ta SE Agriculture Achakbou Newmai-i technical report agütsüdang ashi.

Sentong nung Phezoucha Baptist Church Pastor Keduoneituo Yhome-i ki meshiteta sarasadem aser Additional Director C. Peter Yanthan-i anküp tepela o jembi.



Narendra Modi

Mallikarjun Kharge

New Delhi, December 19, 2023 (Agencies): Lok Sabha elections 2024 agütsü ita pezü dang lia opposition bloc INDIA-i tanü senden pezübuba amendang Narendra Modi den tokteptsü atema Prime Minister nübo asütsü tetshio.

Congress president Mallikarjun Kharge-i INDIA bloc coordinator ama inyaksüla aser pa Prime Ministerial candidate ama sayutsüla ta senden nung West Bengal Chief Minister Mamata Banerjee aser Delhi Chief Minister Arvind Kejriwal nati ashi.

Senden atemba sülen Marumalarchi Dravida Munnetra Kazhagam (MDMK) MP Vaikolia PM mapa atema Kharge shimba nung ashishitep kecha mali ta shio.

Ajisüaka, Kharge-i iba tebilemba magizük aser tongtipangtibaji election nung takok angutsü atema asütsüla ta ashi.

“Mezüng asenok ajaki takok angutsüla, takok ngur kechi inyaksü ta asüba asenoki bilemstüla. Shiba PM asütsü ibaji yaser lemtettsüla. MP ishika dang süra asenoki kechiba PM atema

jembitsü nungdak? Mezüngbuba nung asenok longjemer menden teimba nung takok angutsüla, asenoki mezüng majority angutsü merangtsüla. Mezüng asenoki takok angutsü merangtsüla” ta Congress president Kharge-i ashi.

Taoba union minister Kharge ya Dalit nunger lir. Tanü senden nung Kejriwal aser Banerjee naprongi Dalit PM sayuba ajanga opposition bloc ajangzüksü ta ashi.

“Tanü INDIA teloktep indang senden pezübuba menogo. Party 28 nungi lennirtem iba senden nung aden aser parnok tebilembatem lemsatep. Nisung ajak külemi longjem aser teloktep akangshitsü atema jembi. Nübertem dak sendakba onüktem benoka lemsatep aser nisung ajaki senden 8 nungi 10 tashi amentsü lemtet” ta Kharge-i metetdaksü.

Senden nung Sonia Gandhi, Rahul Gandhi, Tamil Nadu CM MK Stalin, Bihar CM Nitish Kumar aser Lalu Prasad Yadav nunger aden.

Wokha nung Yimpang Platoon Post lapokshir



December 19, 2023 nü Deputy Chief Minister Y. Patton-i Bhandari sub-division kübok Yimpang Platoon Post 7th NAP Bn. lapoktsüba sülen agiba noksa ka angur.

Wokha, December 19, 2023 (DIPR): Wokha district nung Bhandari sub-division kübok Yimpang Platoon Post 7th NAP Bn lapokogo.

December 19, 2023 nü Dy. Chief Minister (Home & Border Affairs) Y. Patton-i Platoon Post lapokja liasü.

Sentong nung MLA 40 AC & SDPDB Bhandari Chairman Achumbemo Kikon aden.

“Yimpang Platoon Post dang ‘Ethung Post’ ta-a ajar aser iba ya 1970 tashi laoka liasü saka timtem kar ajanga shibangtsüsa aküm. Iba post tanaben lapokba ya litsü kümzüka ayutsüba dang masü saka ozüng alema inyaksangshi azüoktsü, security agütsütsü aser arrtsülen tensa süngjema ayutsü atema lir” ta Y. Patton-i ashi.

“Iba Platoon Post ya kanga dang tongtipang tesem ka nung lir anungji bangdak department-i nübo peria lemküksütsü ayongzük. Ajisüaka tashi mangartem aser yi ajemer-mozü achirtem meyoktsüla” ta paisa ashi.

“Y. Patton-i iba Platoon Post lapokshiba asoshi süoki ia bilemba aser yaritepba atema pelar. Iba post takok ngua inyaksangshitsü atema ketdangsurtem, Platoon personnel aser public amalitep alitsü mepishir” ta MLA Achumbemo Kikon-ia ashi.

IGP (R) Nagaland Limasunep Jamir, IPS-ia iba tesem kanga junga meteta ketdangtsütsü metetdaksü.

Yimpang nungeri Y. Patton dang nübertem asoshi ano Police Out Post talila lapoktsü aser gari lenmang tajung yanglutsü mepishia metetdaksü.

Kasa sentong nungsa Y. Patton aser Achumbemo Kikon nati Bhandari sub-division kübok Zujum yimsüng lapoktsü.

Sentong nung Rev. K. Renphamo Odyuo-i post meshiteta sarasadem, Commandant 7th NAP Bn Bhandari Menangmeren, NPS-i tesentepertem pelaa agizük aser Dy. Co (2IC) 7th NAP Bn Bhandari Sentilong NPS-i anküp tepela o jembi.

WHO-i JN.1 dang 'variant of interest' jaloktsür

New Delhi, December 19, 2023 (Agencies): JN.1 Covid strain ya “variant of interest” ka lir saka iba ajanga public health nem lendong tulu bentsür marutsü ta World Health Organization (WHO)-i ashi.

Tesüba nung JN.1 ya BA.2.86 nung shilem ka ama ‘variant of

interest’ ta züngoka liasü.

“Kulitem nung ajemdaker JN.1 ajanga global public health risk kanga ajema lir” ta WHO-i ashi.

Tang tamshidak vaccines ajanga JN.1 aser tanga Covid-19 virus indang variant balala nungi kümzüka ayutsü ta WHO-isa metetdaksü.

WHO-i virus melenshir anungji linüktem dang kanga junga mita alitsü aser sequence sharing asütsü metetdaksü liasü.

India nunga Kerala nung iba variant putetogo aser iba jagi Centre-i yashi state sorkar ajak dangi mita atatsü aser kümdanga alitsü osang sangdongogo.

JKTM platinum jubilee takok ngua mungogo

Mokokchung, December 19 (TYO): Jangpetkong Kaketshir Telungjem Mungdang (JKTM) tenzüker kum 75 ajungba jubilee Dec 18 & 19 anogo ananü ‘Mita Yanglushidi’ omen dak rangloker Alongkima nung takok manung mungogo.

19th Dec nü sentong nung mejeta jaoker Nagaland Legislative Assembly (NLA), Speaker, Sharingain Longkumer-i jembidang, tangari asenok nem “mezüngpur (land of pioneers)” ta nungja agütsüba ya asen tsüraburtemi meranga inyakba ajanga ngutetba lir, saka tanü asen jenjang koba nung lir, ta asüngdanga ashi.

Nagaland nung Baptist kangki asen lima mezüng yangi meso, mezüng shisaliok tenzükdak, mezüng nungtugu saisabonger adokdak, kakat zülur adokdak, sorkar tenzüker tular adokdak mapang ka liasü, ajangla tanü asenok koba lenmang nung samatok, ta paisa asüngdanga liasü.

Elected member-tem aser

lenirtemi kechi inyaker ta asüba shisatsü melenshir asenok lungjemer kechi inyaker ta asüba arok shisatsü lanurtem dak lidaktsünür, ta paisa ajungshi. “Tanishir ka akümtsü asoshi tanitaker tajung ka asütsü nungdaker”, ta paisa shisem.

“Mezüngpur” ta asüba jagi temulung sür alitsüba masü saka mezüngpur ka ama tanü Aortem shisatsü nung, tamangba nung, temulungjang, jembishinü aser maparen ajak nung tasen küma yanglushitsüla, ta paisa ayongzük.

“Mezüngpur” dakji temulung tulu, meranga inyakba, mapa tasen yangertetba, tebilemstü balala asoshi taneptsü bener arutetba item jaklatemji alitsü nungdaker aser “mezüngpur” mapaji yangi nungi tenzüksüla, kechiaser ya mezüng mapa tajung tenzükdak mungjen lir, ta paisa shisem.

“Mezüngpur” ka ama tangar dak nendaka malitsü aser pei sempet ngutettsü merangtsüla. Asen tsüraburi ayongayonga kecha meinyak, par mapang

timtem jenti ajuruaka parnoki itemji tizükteta meranga inyak, tanüa asen jakdang tayongzükba aika lir, anungji, tesüba mapang khen meyipa reprangshiba den asendenshitsu asoshi paisa ayongzük.

Tanü joko govt. job kanga apara kumogo aser joko govt. mapa inyaker onsara, aji saka, tajunger atema aser meranga azünger atemabo sorkar mapa inyaksü maoangka peria dang lapoka lir, ta paisa ashi.

Paisa Jangpetkong area nung lenmang aser light (electricity) tsütsü akokba tashi nung yariteptsü asoshi yimjak nung metetdaksü.

Speaker-isa JKTM platinum jubilee nungtem adokba nungo kakat ka sayatsü. Sentong nung “Tera dangi meyipdi” onük nung ajemdaker Kohima Ao Baptist Arogo Pastor, Arep Tzüdir-i jembi aser sentong balaka nung “tejakleni ilongdi” onük nung Dept. of Agronomy, NU SASRD, Medziphema, Dr. L Tongpang Longkumeri jembia liasü.

Changtongya nung petrol pump ka lapokogo



Changtongya town nung SDO (Civil), Wb.C.Wangani petrol pump ka tenüng agi Tir Service Station lapoktsüba noksa nung angur. (CTN December 19,2023).

CTN.December 19(TYO): Changtongya town kümer mezüng gari nung totzü enokba tesem ka National Highway agi ajangba New Medical Colony, Changtongya town nung tanü Mongolbar nü SDO(Civil) Changtongya, Wb.C.Wangan (NCS)-i semzüksüogo.

Iba totzü enokba tesem ya HPCL purtemi lapoktsüba lir aser iba petrol pump tenüng ya Tir Service Station ta agüja lir.

Tanü iba totzü enokba tesem

semzükja jembidang, " ibai talisa Changtongya area nung alirtem asoshi tepelatsü anogo ka lir. Joko asenok mapaji nübertem ronsen kümzüka ayutsü aser anepalutsüba dang lir," ta Wb.C.Wangan metetdaksü. Paise iba Tir Service Station Kibur nem tenüngsang agütsü aser HPCL dang pelaba metetdaksü.

Iba sentong nung Changtongya area nung aliba yimtsüngtem nungi tatartem aser Changtongya town nung All

Ward Union, GBs Union aser Baptist Arogo lenirtem dena liasü.

Iba totzü enokba tesem meshiteta Longchara Baptist Arogo nung sannüker Wb.Moamereni sarasadem aser kasa arogo nung Associate pastor (Youth) Wb. Meren Imsongi sentong len ania liasü. Sentong tatem küma lokti külemi sarasadem Tzumokkong Baptist Arogo nung sannüker Rev.Dr.J.Imti Longkumeri sarasadema tembang.

Pariksha Pe Charcha 2024 atema metetdaksür

Dimapur, Luchii/December 19 (TYO): Ato Kilonser Narendra Modi-i kaketshir, tesayur aser tsürabur tem den sensaksemba sentong Pariksha Pe Charcha (PPC 2024) 7 buba edition ya Talkatora Stadium, New Delhi nung town-hall format nung January/February 2024 nung agitsü.

PPC 2024 nung shilem agitsüpur shimtsü atema [innovateindia.mygov.in/ppc-2024] (h t t p s : / /

innovateindia.mygov.in/ppc-2024) nung December 12, 2023 nungi tenzüka January 12, 2024 tashi agitsü Online Multiple-Choice Question (MCQ) Competition tenzüko.

Iba tetoktepba ya kaketshir (Classes 6 nungi 12), tesayur aser tsüraburtem asoshi lir. Shilem agir ajunga nem Director, NCERT ajanga meyongnem agüja aliba Certificate ka-ka agütsütsü.

Iba tetoktepba nungi

NCERT ajanga shimtetba tasüngdangba tem iba sentong nung amshitsü akok.

Shilem agirtemi taoba mapang ama osangbener den sensaksemtsü maongka angutsü akok. Anungji Nagaland nunga Heads of all Schools (NBSE/CBSE/ICSE/ Govt./Private) tem dang iba sentong nung kaketshir, tesayur aser tsüraburtem dang shilem agitsü asoshi ajungshitsü metetdaksüogo.

Ato Area Women Skill Development Centre amenokba nung AR-i yari

Dimapur, Luchii/December 19 (TYO): Niuland district kübok Nihokhu yimdak Community Gall nung Ato Area Women Skill Development Centre amenoktsü asoshi Sewing Machines & Handloom Machines alitsü atema Assam Rifles temi financial year 2023-24 indang Civic Action Program kübok project ka inyaka liasü.

Yamaji tetsürtem pei sasa pei peria alitsü asoshi teyari

agütsütsü yangatetba nung Assam Rifles temi iba Skill Development Centre atema Handloom Machine pezü aser Sweing Machine pongu alitsü.

Ato Area Women Skill Development Centre nung amenokba machine tem ya yimtsüng nung ketdangsürtem nem December 19, 2023 nü sentong ka agia Maj Gen Vikas Lakhera, Sena Medal, Inspector General Assam Rifles (North) ajanga amokja liasü.

Iba sentong nung Naga nung sobaliba yimya balala agi shilem agia aser ken tena tsüngsanga liasü.

IGAR (North) ajanga iba sentong nung jembidang, lokti tejakleni anir aoba nung tetsürtemi shilem tulu agiba indang lemsatepa liasü.

Ato Area Women Skill Development Centre ya ajanga tetsür aika tajanzük angutsü. Iba sentong nung nisung 400 shi dena liasü.



Directorate of Health & Family Welfare nung December 19, 2023 nü Advent Christmas benjong munga liasü. Iba sentong nung menden Dr. Tiala Director (ME & RS) liasü aser Principal Director Dr. Ritu Thurr ajanga 'What Christmas means to me' onük nung jembia liasü.

Nagaland Angh-i Christmas salem lemsatep

Dimapur, Luchii/December 19 (TYO): Asen dangi tepela Khristmas mongpu tonga arudang, nenok ajak dangi kü temulung taroktiba nungi salem abener, ta Nagaland Angh, La Ganesan-i sangdong ka ajanga ashi. Ibai temeim, dangar dang aria bilemba aser telungjem tanüla benjongba mapang lir.

Yimya balala agi iba benjong amungba angutsüsa maongka anguba atema kanga pelar. Christmas ajanga tesendaktep aser telungjem bener arutsüba ya asen Naga nung tesendaktep nung kanga junga yangera lir, ta pai ashi.

Iba benjong ajanga ner kibong nung tesangwa alitsü aser Christmas tanüla agi asen mulungjang asüngtsü teimla lir. Tajemzüikba jenjang nung alirtem den tepela lemsateptsü aser asenok tsüngta tesendaktep tali akangshitsü asenoki mamatokli.

Asenok ajak külemi yimjung asoshi mapa tajung inyakti aser item mapa tajung küm taseni bener oti.

Ajak den temoatsü aliba Christmas aser yimchiyimjung, anema aliba aser tepela agi asüngba küm tasen südakjang ta moatsür, ta Angh La Ganesan-isa ashi.

NBSE ajanga metetdaksür

Dimapur, Luchii/December 19 (TYO): Physics, Economics aser Computer Sciences nung Junior Academic Officer atema application agüja alirtem dang iba Recruitment Examination ya January 30 & 31, 2024 nung Kohima kisüng nung agitsü, ta Nagaland Board of School Education (NBSE) ajanga sangdong ka nung ashi.

Examination center indang tejangja meilongi

metetdaksütsü. Admit Cards ya January 24 & 25, 2024 anogotem download sütettsü.

Candidate temi pei application jenjang (accepted, provisionally accepted, mesüra rejected) Board indang portal www.nbsenl.edu.in nung reprangtettsü.

Iba dak sendakba nung metetpelatsü asoshi nbserecruitment@gmail.com ajanga tongteprateptsü akok, ta sangdong ajangasa ashi.

Noklak nung tetsür ita shilem aoba indang kaket ka saya



Dimapur, Luchii/December 19 (TYO): Boditive India den lungjemer Beti Bachao Beti Padhao kübok District Administration & District Hub for Empowerment of Women, Noklak ajanga 'Sob Maiki Nimate Mahina (Periods) Laga Jankari' nungja agütsür tetsür ita shilem aoba indang kaket ka saya.

Iba sentong ya December 19, 2023 nü Deputy

Commissioner, Noklak indang Office Chamber nung Miss Khiamniungan 2024 Thongkoi- i agia liasü.

Tetsür ita shilem aoba indang tongtipang osangtsüsang agütsütsü nükjidong nung iba kaket ya Nagamese nung zülü aser iba kaket ya tetsürtem nem lema agütsütsü. Taoba mapanga iba kaket ya English oshi nung menünga kaketshir tetsürtem nem lema agüja liasü.

NH project atema land compensation asoshi metetdaksür

Dimapur, Luchii/December 19 (TYO): Cabinet ajanga agizükba ama aser state nung National Highway project tem tajungtiba nung inyaktü asoshi Government of Nagaland ajanga sangdong ka agüja liasü.

Tang nungi tenzüka Land Compensation aser Damage Compensation ya State nung Ministry of Road Transport and Highways (MoRTH) ajanga sangdongba National Highway Roads yanglutsü atema kija/

community landowners nem agütsütsü.

Iba sangdong ya National Highway projects yanglur asoshi nungdakba ali agitsü aser tang aliba National Highways dak alia terenlok mapa inyaktü asoshi ali tali/Right of Way (ROW) tashi alitsü.

Iba sangdong ya ajanga taoba mapang sangdonga alibatem melenshitsür aser tang nungi tenzüka amshitsü, ta sangdong ajanga ashi.



Delhi Chief Minister aser AAP Convenor Arvind Kejriwal aser Tamil Nadu Chief Minister MK Stalin na New Delhi nung senden amenba mapang tangokba noksa nung angur. AAP MP Raghav Chadha aser DMK MP TR Baalu aser Dyanidhi Maran nata noksa nung angur.

Taoba CM Raman Chhattisgarh assembly speaker kumogoo

Raipur, Luchii/December 19 (Agencies): BJP MLA tejen aser taoba Chhattisgarh chief minister Raman Singh, Mongolbarnü ajaki mulungtepa state legislative assembly speaker asütsü shimogo. Tawa shimba assembly indang mezüngbuba session Mongolbarnü tenzükogo. Chief Minister Vinshu Deo Sai-i election atema arishi küm 71 tain Singh speaker ama shimtsü asoshi benok aser iba atema Deputy CM Arun Sao-i oshidang agüja liasü. Opposition lenir Charandas

Mahant-ia speaker ama shimtsü asoshi Singh tenüing benok aser Congress lenir tejen aser taoba Chief Minister Bhupesh Baghel-i oshidang agüja liasü. Maneni BJP züingsem asem tashi-i speaker mapa bendaktsütsü asoshi Raman Singh shimtsü mulunga aliba lemsatepa liasü. Speaker mapa asoshi Singh-i Deobarnü pa indang nomination benoka liasü aser ashiba agi, pa mapa tasenbaji Chhattisgarh Vidhan Sabha nung ajak anepalutsü asoshi asütsü.

Singh ya taküm agi tenetbenbuba election nung takok nguogo. Pai Rajnandgaon menden ya taküm agi term pezübuba atonga kokogo. Pai iba menden ya 2008, 2013, 2018 aser 2023 küm kokogo. Chhattisgarh ya Congress-i taoba küm pongu yimsüsüa aruogo, ajisüaka taoba ita state election nung parnok BJP-i tsükdakja liasü. Iba election nung BJP-i menden 90 nungi 54 akok aser Congress-i menden 35 dang koka liasü. Gondwana Gantantra Party (GGP)-i menden ka koka liasü.

INDIA den sensaksemtsü atema Congress-i committee ka shim

New Delhi, Luchii/December 19 (Agencies): 2024 parliamentary election atema menden lemsateptsü asoshi INDIA nung züingoksema aliba party tem den sensak asemtsü asoshi Congress-i Mongolbarnü national alliance committee (NAC) ka tentettsüogo, kong party lenir tejen pongu densema lir. NCA ya party lenir Mukul Wasnik lenisüba nung inyaksangshitsü aser züingsemtem rongnung taoba CM ana; Ashok Gehlot aser Bhupesh Baghel na, taoba Union minister Salman Khurshid, aser party lenir, Mohan Prakash nunger

densema lir. "2024 General-Election magi tsüingda Congress tir-i National Alliance Committee ka tentettsüogo," ta party general secretary KC Venugopal-i ashi. Mongolbarnü Delhi nung INDIA telok senden pezübuba amentsü mapang tatsüka dang lia Venugopal-i committee tentetba indang osang lemsatepa liasü. Committee nung lenir tejen pezü züingoksema ajanga tanga party tem den menden lemsateptsü asoshi sensaksema mapang parnok sadem sadema inyaksangshidaktsütsü asoshi ta sayur. "Parnok ajak lenir

tejentem lir aser INDIA partner temi parnok nongshiba parnoki agitettsü," ta Congress lenir kati ashi. Iba committee tentetba ya kanga tongtibang lir, kechiyong menden lemsateptsü asoshi sensaksem menoa magiba atema INDIA bloc partner tem karibo Congress aitsüogo. September 1 nü INDIA telok senden amenba mapang menden lemsateptsü asoshi sensaksem takaratiba nung tenzüktsü ta bangjem saka Congress-i Rajasthan, Chhattisgarh, Madhya Pradesh, Telangana aser Mizoram nung assembly election result ata liasü.

Lok Sabha nung ano opposition MP 49 anentsüogo

New Delhi, Luchii/December 19 (Agencies): Mongolbarnü ano Lok Sabha nungi opposition MP 49 anentsüogo. Hombarnü house anaprongla nungi MP 78 anentsüba sülen tang ano MP 49 anentsüogo. Parnok ya winter session tatem tashi suspend sütsüogo. Parliamentary affairs minister Pralhad Joshi shiba law minister Arjun Ram Meghwal-i mejembi tsüingda jembia liasü, pai opposition MP tem anentsü asoshi benok aser ashiba agi, parnok ya tawa election makokba ajanga tezü adanger. Taoba hopta Parliament security rakpoka aitba dak sendakba nung sensaksem akatsü aser Ato Kilonser aser home minister nati telanzüba agütsütsü asoshi opposition MP tem khanga liasü. "Parnoki placards bener marutsü atema mulunga agizükogo. Parnok tamakok anguba ajanga tezü adanger aser ibayongji iba amala jenjang agir. Iba amala yimya ya dang maneni beshira item nisungtem ya House-i tanaben meyipa marutsü," ta Joshi-i ashi. Mongolbarnü MP 49 anentsüba sülen ajak senteper Lok Sabha MP 95 anentsüogo. Iba den Rajya Sabha nungai züingsem 46 anentsür lir. Mongolbarnü anentsüba MP tem rongnung Nationalist Congress Party nungi Supriya Sule, Jammu & Kashmir National Conference MP Farooq Abdullah, Congress lenir Shashi Tharoor

asir Karti Chidambaram, Bahujan Samaj Party nungi Danish Ali aser Samajwadi Party nungi Dimply Yadav nunger densema lir. Supriya Sule-i ashiba agi, MP tem aika mapa nungi anentsüba ya mesangdong saka emergency mesüka lir. Karti Chidambaram-i ashiba agi, pai placard amer maliasü saka pa-a mapa nungi anentsüogo. "Ni kechiba suspend sütsü aji ni mangateter. Ni yimyima mayim mesüra placard-a bena maliasü. Ni aisle nung nokdaka liasü. Ano Dimple Yadav bo aisle nunga noktaka maliasü. Lai la nem lemsüktsüba tesem nung nokdaka liasü. Iba ya technical suspension ka asütsü," ta Karti-i ashi. Kasa mapang nung Congress MP Shashi Tharoor-i ashiba agi, "parnoki Opposition-mukt Lok Sabha ka aginer aser Rajya Sabha nunga ibala mesükba ka inyaktsü. Tia maka onoki India nung Parliamentary democracy atema molungnen o zülutsüsa akümtsü. Külem tenzükertem den külemi ni tanü longkak aitba nung shilem agi aser longkak aitba nung densema alir ajak session tatem tashi suspend sütsüogo, koba tetezü parnoki sensaksem kecha makai parnok indang bill tem agizükner," ta Tharoor-i ashi. Farooq Abdullah-ia, iba tatalokba dak sendakba nung union home minister Amit Shah-i jembitsü asü. "Shiba küboki police aiter? Ken o dak sendakba nung pai parliament nung jembi asübo kechi süla," ta Abdullah-i ashi.



Centre-i Covid dak sendakba nung tetuyuba agütsüba sülen Hyderabad nung Government Fever Hospital nung Healthcare worker temi medical equipment aser yipdentem anepaluba noksa nung angur.

BJP lenirtemi HP Assembly kima longkak ait

New Delhi, Luchii/December 19 (Agencies): Congress party-i parnoki tenanzükbatem mataloktsüba anema BJP party nungi lenirtemi Himachal Pradesh Assembly kima longkak aita liasü. BJP lenirtemi ashiba agi, Himachal Pradesh nung Congress party-i tenanzükba 10 agitsür 2022 küm Himachal Pradesh nung sorkar künfteta liasü, ajisüaka item tenanzükbatem mataloktsür. Apron temesung nung Congress party-i tenanzükba agütsübatem zülür BJP party nungi ozüing yanglurtemi sorkar anema yimyim ayima longkak ait aser state nung aliba nüburtem ashioksüba atema parnok aija liasü. State nung aliba nüburtem tang tashi angati electricity unit 300, tetsürtem atema ita shia sen 1,500, mapa tasen lakh pongu, English medium school

tem aser aluyimertem rongsenketzüng jenjang tajungba kümtsütsü nangzükba atatepdar, ta BJP MLA temi state indang asükwa yimtiba Dharamshala nung assembly kima ashi. Thakur-i ashiba agi, Congress sorkari küm ka nung loan crore 12,000 agiogo aser outsourced employees 10,000 dak tema mapa nungi anentsüogo. State nung terenlok maparen anenogo, kechiyong sorkari educational, revenue, health aser tanga institution 100 dak tema shibangtsüogo, ta pai ashi. BJP lenir-isa, Ato Kilonser Narendra Modi-i nangzükbatem dang ataloktsür, kechiyong pa ya pai jembiba ama inyakba nisung ka lir, ta ashi. Anogo pongu agitsü aliba state Assembly winter session ya December 23 nü tembangtsü.



Mapa nungi anentsür aliba TMC MP Kalyan Banerjee-i MP tem mapa nungi anentsüba anema Makar Dwar nung longkak aitba mapang presiding officer-i House leniba jilushiba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, DECEMBER (LUCHII) 20, 2023

Tatartem Senden Memesük

- Tangsen Lemtur

India linük nung mapa manguba tebilemtsü, nütsüng tali arenba tebilemtsü, tetsürtem anema inyakba tebilemtsü, sensak tia aser ochimashi tebilemtsü densema tebilemtsü onük jenti lir, aser item tebilemtsü koktettsü mesüra ajema akümtsü atema nüburtemi shimtetba tatartemi (Members of Parliament) House anaprongla nung mapang peria agia item tebilemtsü onük benoka o entepa mesüra lemtepa lenmang bushitsü nüngdak. Ajisüaka tia maka tongtibang masüba onük kar nung ang sorkar aser opposition na tekong merangtepba ajanga aiben senden junga magiteter. Taoba hopta Parliament nung security raksaba tatalokba dak sendakba nung opposition züngsemtemi Union Home Minister, Amit Shah dang sendeni arua telangzüba agüjang ta akhanger, aser sorkaria opposition-i akhangba amaji meinyakba agi asükwa mongpu Parliament senden junga magiteti arudar. Parliament nung senden tiptema magitetba ya tang tasen masü saka tesüiba küm aika yamai dang arur. Ano taoksatsü kaji opposition MP 92 tashi asükwa mongpu senden piyong atema anentsüogo. Parliament nung tongtibang onük aika süoka jembitsü meranger saka sorkari nokdang; iba ya ajanga democracy nükjidong mataloktsür. Nüburtem taküm jenjang tajungba kümdaktsütsü atema Parliament nung tatartemi mapang peria agia o lemteptsü nüngdak, aser tongtibang onük karbo Parliamentary aser standing committees nem agütsür, iba sülen ang telemtetba agir mesüra bill tem agizüker. Ajisüaka mapang peria agia o melemtepi tongtibang Bill tem agizükba ajanga nüburtensa akoksar. Parliament ya India nung democracy tekülem ki, ta jembir saka iba Parliament nung senden agibaji reprangdangra tatartem senden memesük! India ya alima nung democracy linük tulutiba ta züngshir, ajisüaka mapang shia India nung democracy jenjang mejungi akümba ajanga linük tenüngsa menüker. India nung mezüng democracy jenjang mejungi akümba mapangji 1975 küm June ita nungi 1977 küm March ita tashi liasü; koba dang 'Emergency' mapang ta ajar, aser tanabubaji 2014 küm nungi tenzüka linük nung democracy jenjang tamajungba akümer, ta democracy watchdogs-i züngshir. 2021 küm Freedom House ajanga India ya Free democracy aliba nungi Partly Free democracy kümogo, ta metetdakja liasü; kasa küm nungjisa Varieties of Democracy (V-Dem) project-ia India ya electoral democracy masü saka "electoral autocracy" kümogo, ta sangdong. Research agirtemi ashiba agi, 2014 küm nungi 2022 küm tashi nung India nung lawyer tem, kaket/ocet zülurtem, meimchir temeden atema inyakertem aser sorkar anema ola adokertem densema yimtenren dak sendakba nung nisung 250 shi jail nung puokogo. Watchdog- Access Now-i ashiba agi, alima nung internet teimtiba shibangba linükji India lir. India nung minorities aser Dalit nungertem anema inyakba jenjang tamajungba kümogo. Item ajakji asadanger organizations aikati India nung democratic record tamajungba akümba metetdaktsür. Economist Intelligence Unit indang democracy index nung 2014 küm India nung jenjang 27buba nung aliba 2022 küm nungbo jenjang 46 tashi aluadokogo.

OLEMSABANG

Tanü ya Naga Arogo Asoba anügo lir

- N.Toshi Ao

Asenok ajaki ngua taoba hapta nungang Nagaland Govt-i ayongzükbä Hornbill Benjung kanga junga tembangogo. Iba benjungmong nung asen Naga kin ajaki kanga junga pei kin sobaliba (culture) balala sayuogo. Item sobaliba ajak nung kanga mesüktepba asenok ajaki ajitetba kar:

1. Asen Naga nung ya leptept-süngtep kin (Naga were headhunters)
2. Naga nung ya mangsa/tesadang mangsa kin (naked/semi naked people)
3. Naga nungertemji Lijaba yimsü külemertem (Nagas were animistic people)
4. Naga nung ya tetsübutsü aser pei sasa litetba kin (cruel and independent people)

Asen Naga nung iba ama tia nung küm kwi/putu kwi lia aru ashitsü makok, saka asenok ya iba ama tia nung küm jenti lia aru ta asenoki tsüraburtem nungi angazüka lir (Hornbill mapang nung asenoki anguba tobo aeiben tajungba yanglushirang sayuba lir (modified culture).

Ao Kin

Asen Aortem ya Longtrok/Chungliyimti nung küm/putu kwi ali kanga jangjaa ashitsü makoker. Kü research nung ni yamai bushitet.

1. Naga Institute of Art & Culture Report nung ashiba agi asenok Longtrok nung aliba mapang ya B.C. 3000 shi nung liasü ta ashir (Citizen Voice Weekly, an English paper published in Kohima, Thursday, 16 August, 1973.p.3).
2. Asür Panger Imchen kaket nungbo yamai shia lir.

Asenok ya Burma nungi Chungliyimti (Tsüngliyimti) yagi B.C 300 nungi AD.100 meta aru aser yangji küm 900 shi ali aser A.D.1000 nungi 1025 tsüngda yim balalai prokshia ao (Panger Imchen, Ao Mongsen Lipok, Gauhati, 1990.p.23). Yamaji record kanga meputepi ali nung shitak ashitsü kanga tasak.

Saka asen Aortem ya Chungliyimti nungi prokshia aodang lepteptsüngtepa aser sünglong külema oda shiruru tia nung lia senshi südi ta kuli agi sayur.

Ozü Molungkimong yim ya AD.1298 meta aküm ta kuli tejangja bushitetogo. (Molungkimong Literature Board, Naga Lima nung Mezüng Arogo 2019, tapak.7). Anungji özü yim küm kumer küm 574 shi süir kelen Yisu yimsü arua 1872 küm mezüng Arogo ya tenzükbä lir. Molungkimong yimtsüng ya nokinketer sotetdak, Arr tesashi aser sobaliba kanga akanga amshiba yim ka lir (taküm Hornbill Benjung nung itemji aikati nüklai arua repranger alitsü imlar).

Tsüngremer Sentong ya tesüngmangtsü

Asenok ajaki meteta aliba ama 1836 küm American Baptist Mission asen lima leni (North East India) aruba ya asen Naga nung dangi aruba masü, saka parnok mezüng nükjidongji Northen Burma ajanga Tamaren China limai aotsü nükjidong liasü. Anungji 1836 küm tamasa parnok Sadiya, Upper Assam nung anenzük, saka Khamti yimak ajanga ibaji shibangtsüsa aküm. Iba sülenji parnoki Jaipur (Upper Assam) nung anenzüker Namsang yimtak (Nokti kin) Mission centre tenzüka school tenzüka, saka ano Missionary kibong nung shirang tulu den tasüba ajurua 1840 nung ibajia shibangsa aküm. Iba sülen parnok sentong melenshia Sibsagar/Sivasagar (Rongpur), Assam nung amenok. Yangji lia asen Aor tsürabur Longjanglepzüka (Merangkong) nungi 1851 küm temolung meyipa tzü nung bapti saka tia makai 1853 küm asü. Iba mapang nungi tenzüka American Baptist Mission atema dang masü saka Naga kin asoshi " KüM 20 OLA MALIBA MAPANG (20 silent years) liasü. Tali jangjaa angatetnera "Mission to the Nagas" 1995 by N. Toshi Ao, nung angutsü).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Gaza tekülem ki amakba sülen Pope-i kiralongraba aitsü

Vatican, Luchii/December 19 (Agencies): Gaza nung Catholic nung tenlaki ka dang aliba yangji Israel mitkar temi Khristan tsür ana tepsetba sülen Pope Francis-i iba tesem nung kiralongraba anema jembia liasü.

Hokulbarnü tetsür tain ka aser lar jala ka Holy Family Catholic Parish telungnung lia khaset ta Latin Patriarchate of Jerusalem ajanga ashi.

Khristanpur noklang aika jenoka aliba tekülem kidang ya IDF sniper temi tekumdangtsü osang kecha magütsü amak ta ashir.

Kasa anogosa IDF rockets tem khalokja lemtamatar 54 aliba Missionaries of Charity indang ki ka raksatsü ta ashir.

Deobarnü Angelus sarasadem nung Pope Francis-i tekülem ki amakba aitsü, kong kiralongrar masü saka kinungertem, tila tanurtem, shiranger, lemtamatar aser nuns tem dang liasü, ta ashi.

Pai kiralongra raraba anentsü ayongzük aser nüburttem dang yimjung asoshi sarasademtsü ashi.

"Nisung kari ibai kiralongraba ta ashir. Ibai rara lir. Ibai kiralongraba lir," ta pai ashi.

"Iba yongji Laishiba nunga Tsüngremi rara anentsür...lasang raksatsü, nü süksatsü ta ashir. Asenoki tesunep asoshi Tsüngrem dang sarasademti."

"Ukraine, Palestine aser Israel aser danga tesemtem nung rara agi timtema aliba asen adianu aser adianutsürtem asenoki mamadokli," ta pai ashi.

"Khristmas aruba ajanga yimjung lenmang bushiba nung tashi itshitsü amanger."

England aser Wales indang Catholic Church tekolakba, Cardinal Vincent Nichols-ia Hokulbarnü Gaza nung Khristan tsür ana tepsetba atema mangyim-jashi lemsatapa liasü.

Hamas teloki October 7 nü Israel amakba sülen rara tenzükba ajanga taolen mali Khristanpur meyirijang ka shi iba tekülem ki nung jenoka liasü. Parnok ya yangji aliba nun temi anepalua liasü.

Tamanger asüba osang angashia temulung raksar, koba IDF sepaitemi asaa tai maket civilian tem tepsetba sayur, ta Cardinal Nichols-i ashi.

"Iba arogo nung alirtemi ni anaben pelashishia agizüka lir. Yangji alirtem tamang khenyongi balaka aser pei kidanger asoshi parnoki mapa tajung inyaker," ta pai ashi.

"Sister tem den külemi parnoki maneni rara mapang timtemer nem teyari agüja liasü. Yangji yimjung aginertem lir."

"Iba ama nisung tepsetba anentsüla. Yangji kodanga temeden mali. Iba rara anentsü asoshi yimsü balala amangba nüburttem ajanga dang sarasademtsü ajungshir," ta Cardinal Nichols-i ashi.

Rev. Dean Nelson arishi küm 55 nung cancer agi asü

Maryland, Luchii/December 19 (Agencies): African American conservative asoshi tasü ita jembir aser pro-life activist Rev. Dean Nelson, shiba Frederick Douglass Foundation lenir liasü, pa cancer agi mapang tatsüka shiranger arishi küm 55 nung süogo.

Frederick Douglass Foundation ajanga Hombarnepe sangdong ka nung Nelson ya Maryland nung par kidang Honibarnü kinunger temi muketbanger lia amozüka ao, ta ashi.

Pa asüba mapang Nelson ya Douglass Leadership Institute indang chariman aser pro-life pregnancy center network Human Coalition indang vice president of government relations inyaka liasü.

"Nelson indang takum, tanüla aser dangar asoshi temeim tejangja zünger mezüngma kinunger, tembar aser pa meteter mulungjang nung teti alitsü," ta foundation indang sangdong ajanga ashi.

"Pa anogoshi tajungtiba nung liogo ta angateta yangji temulung süngzük. Pai dangar asoshi bendanga agütsür inyakba, asadangtsü mokoki temeim sayuba aser bendanga agütsür Tsüngrem meimba mapa tem agi maneni nisung takum aika ajungmesotsü."

Pro-life activist, kaket tajung zülur aser Martin Luther King Jr. kinunger Alveda King-ia tweet ka nung asükhu lemsatapa liasü. Lai Nelson ya la tembar tajung aser tesayur ka lir ta ashi.

"Tetsü indang tebok nung aliba aser meimchir asoshi anibelem mesasa nokdaker,

Dean-i pa takum Tsüngrem, par kibong aser alima nem bendanga agütsü! Teimla makai mangyimer masü, saka Dean Tsüngrem den alitsü ta pelar," ta Center for the American Dream menden King-i ashi.

US Supreme Court nung tamangba yimsü temeden asoshi aiben ken o jembiba conservative legal non-profit, Alliance Defending Freedom-ia Nelson bilemteta X (Twitter) nung sangdong ka lemsatap.

"Dean ya tamangba yimsü aser takum temeden asoshi tanishir ka liasü. Temeden aser ochi bushiba mapang Dean den aiben külemi inyakba konang amai bilemer," ta ADF ajanga tweet asü.

"Onoki pa takum benjonger, pa mapa asoshi tenüngsang agütsür, aser Nelson kinunger den külemi mang ayimer."

Concerned Women for America indang CEO Penny Nance-ia tweet ka nung Nelson ya tepela agi sünga aliba aser Tsüngrem meimba nisung ka liasü aser pai African American nung temeden asoshi rara, ta ashi.

The Radiance Foundation indang co-founder aser chief creative officer, Ryan Bomberger-ia sangdong ka nung "Kü tembar, külem tenzük aser Khristan nung adianu Nelson asüba osang angashia aoksar aser temulung raksar. Tesüba küm 14 tashi Dean den külemi takum, tamangba aser kibong asoshi raraba konang ama bilemer," ta ashi.

"Pa ajemalur Tsüngrem nisung ka liasü. Pa den külemi inyaker temi pa kanga meim.

Pai Tsüngrem yimli asoshi anibelem mesasai meranga inyakogo," ta Bomberger-i ashi.

Nelson ya University of Virginia nungi graduate süa rhetoric aser communication nung bachelor of arts azüng. Pa ya Wellington Boone Ministries ajanga pastor akum.

Nelson ya Salem Baptist Church of Marshall, Virginia ajanga licensed minister ka ama inyak. Pai kinungtsü den tanur asem yutsür asü.

Tamangba yimsü temeden nung aibelener den Nigeria züngsemtsü akhanger

Washington, Luchii/December 19 (Agencies): Tamangba yimsü temeden asoshi inyaker temi US Congress züngsemtem dang Nigeria ya küm ana jakdang agienba "Country of Particular Concern" nung inoktsü Biden administration ajungshitsü ashir.

Taoba Mongulbarnü Rep. Chris Smith, R-N.J. ajanga religious freedom advocates 20 dak temai züluba shiti ka ola tulu adoka azüng aser congressional record nung inok.

Smith-i ashiba agi, Congress züngsem 20 dak tema nem agütsüba shiti nungya Nigeria nung tamangba yimsü temeden jenjang kanga mejungi kumer aliba indang shia lir aser International Religious Freedom Act of 1998 kübok iba linük ya Country of Particular Concern nung züngsemtsü ashir.

International Religious Freedom Act of 1998 ajanga melaba U.S. Commission on International Religious Freedom yagi State Department dang Nigeria ya CPC list nung inoktsü ajungshia aru.

ANOGO ABEN TSÜNGREM DEN

Mapa aser tenzükba

T.M. 27: 22-31

Aser tenetnübuba nung Tsüngremi pei mapa ajak nungi anisüngzük Ibri 4:4.

Tsüngremi asenok anogotem mazüngi dangbo melidaktsüner. Pai asenok mapa toktsür Pa nungi anisüngzük agitsü ajungshir. Pai alima ozüng yutsü saka Pai ajak teputtep nung shidak yutsü. Ibaji Tsüngremer teyangluba maparenji lir.

Kasaji asenok taküm asoshi yimya ka tenteta yutsü; asenok tashi telatet ka yutsü. Nisung takümüji maneni animesüngzüki dang alitsüba masü. Ibai mapa inyakba aser anisüngzük melentepba alitsüba lir. Kodang asen Kibuba nisung chir ka ama aru, Pa mapa telemtet ka liasü. Pa aputsü aser kangki nung angenloktsü mapang tonga arudang Yisui pa Tebu dang sarasadem, "Nai kü nem kechi mapa teinyaktsü agütsü aji inyakmar külen, ni na alima nung sentsüwangshidaktsü" (Yn. 14:4). Yisui Pa taküm nükjitungji kechi metetta liasü aser iba mapa renemtsübajia metetta liasü. Yamaji Pai asenok nungi aginüba mapaji Pai kechi inyaktsü agütsü aji inyaktsüba. Parnoki sarasademtsü angazüktsüla, "Nai mulungba kü dang sayuang", Tsüngremi mulungba ngutetba nung anisüngzük angutsü ta metet.

Anogo shibang dang item tebilembatem asen mulungjangi arur. Aika inyaktsü anunga lir. Asenoki asen sasa aitsütsü akok kechiaser asenoki tera dang inyak. Saka külenji temenen inyakba aika lir masü nu? Kar azümesena ali, saka kar anisüngzük mapang magli pei sasa sama, nisunger temoatsü asoshi Amongnü shitetta ayuba mamong pei sasa tesama angu.

Temeim Yisu, onok aiben animesüngzüki aser khuret abener. Onok Ne dangi meyipdakjang kechiaser Ne dak dang onoki onok tanela asoshi anisüngzük angur. Amen.

Tamangba yimsü temeden U.S. Ambassador-at-large for International Religious Freedom Sam Brownback, Global Christian Relief President and CEO David Curry aser Save the Persecuted Christians Executive Director Dede Laugesen nungertem lir.

Taoba küm alima tesem ajanga nung tamangba yimsü mechi Khristanpur tepsetba ya shilem 90 bo Nigeria nung liasü ta Open Doors ajanga bushitetba shiti nung shia liasü. Aid to the Church in Need ajanga ashiba agi, 2022 küm tenzük Catholic putir 100 pua bener ogo aser item rongnung 20 tepsetogo. 2009 nungi tenzük Khristanpur tenlaki 17,000 dak tema rongdoktsüogo aser karbo tamangertem tekülem ki telung nung lia mi senloktsü ta ashir.

Tamanger temi iba ama timtem jenti ajuruaka Nigeria sorkari bushisüngdanga obendang magütsüteter, aser ibaji ajanga mapa tamajung inyaker temulung tali uludaktsür, ta shiti nung shia liasü.

Shiti nung meyonngem agütsür ya Southern Baptist Convention Ethics and Religious Liberty Commission President Brent Leatherwood, former Congressman Frank Wolf, International Christian Concern President Jeff King, Faith and Freedom Coalition Executive Director Timothy Head, Family Research Council President Tony Perkins, former

AO OSHI ANGAZÜKDAK:
TANÜ ANGAZÜKTSÜBA OJANG



Shilu

(n) meyipa aruba , tanaben atalokba (return, recurrence)

* Junga alirtem asoshibo temoatsü aiben shilua arur.

Shilu

(n) kin balala (racial groups)

* Africa lima nungi aruba shilu ajak tanak asür.

OLONG PAITEP # 6649

15x15 crossword grid with numbers 1-15 indicating starting positions for words.

TIPILEN

- 1. Balaka
- 6. Aika shirangba
- 7. Tartatsü
- 9. Neni'er jabaso
- 10. Sen latettsüba
- 11. Tangar kibokalir
- 14. Ion nung inokba
- 15. Tzi ayindak
- 16. Ajck

LANGTSÜNGLEN

- 2. Hai sür inyak
- 3. Aor teringka
- 4. Ali telungi talangalur
- 5. Tebang kenongi mazioker
- 8. Ken atara anenzükertem
- 9. Toktepa nohtak
- 10. Sen
- 11. Banjongagi
- 12. Telung nung rizinga ayu
- 13. Tebang nung enok

OLONG PAITEP # 6648 TELANGZÜBA

TIPILEN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Sүjak, 10. Aonung,
- 11. Dokan,
- 13. Tinu.

NAI - A YA METETER MA



Arishi küm 90 tain US tsür Minnie Payne-i High School zünger küm 73 sülen Master's Degree renemogo. Taoba hopta University of North Texas nung Minnie Payne-i külem graduates meyirjang aika den külemi noktak. UNT kaketshir coursework renemer tantsütilaji Minnie Payne lir. Minnie tebu o tetsü na ya textile workers liasü aser sensaker, iba jagi 1950 nung lai high school nung graduate asü aser junior college tatsüka azüngba sülen real estate company ka nung clerk ama inyak. Lai High School toktsüba sülen küm 73 lir Interdisciplinary Studies nung Master's Degree ngutetogo.

Assam nung Congress Lok Sabha tickets meshir 47 lir



Guwahati, December 19, 2023 (Agencies): Sangküm Lok Sabha elections atema Assam nungi nisung 47-i Congress ticket meshiogo saka parnok rongnung tang teinyakdak MP asem maden. 2024 Lok Sabha election atema ticket meshiba applications Mongulbarnü tembangsü. Assam nung Lok Sabha

menden 14 lir aser Congress MP asem aliba nungi parnok kati form meshiogo saka ano magütsü ta osang angazüker.

“Lok Sabha menden balala atema applications 47 aruogo. Parnok rongnung tetsür aika dena lir. Barpeta MP Abdul Khaleque-i Hombarnü application form meshiogo saka tanüngba MP ana- Nagaon nungi Pradyut Bordoloi aser Kaliabor nungi Gaurav Gogoi nati form ano memeshi lir” ta osang ajanga ashi.

“Tang Parliament session tagidak lir anungji ozü lennirtem kanga mazüing lir. Applications agütsüba anogo atsülangtsü akok” ta pai ashi.

December 11 nungi form meshiba maparen tenzük aser

form agütsür shiai Rs 1 lakh agütsütsü ta Assam Pradesh Congress Committee (APCC)-i ashi.

Assam nung party 15 adenba opposition forum nung Congress dena lir aser parnoki 2024 Lok Sabha elections külemi toktepnür. Anungji constituency kar nungbo candidate meyoktsü.

Party 15 agi akümba United Opposition Forum Assam (UOFA) ya Indian National Developmental Inclusive Alliance (INDIA) den liromedema akümba lir.

UOFA teloktep nung BJP, Rajjor Dal, CPI(M), CPI, Jatiya Dal-Asom, NCP, RJD, Janata Dal (U), TMC, CPI(ML) aser AAP dena lir.

Assam nung taila Tata spare parts yangluba putet

Guwahati, December 19, 2023 (Agencies): Assam kübok Silchar nung tanü Tata Motors indang taila spare parts maparen inyakba makdokogo.

Kolkata nung alir kati ken o benokba sülen iba inyakyim ya puteta makdok. Police-i Sonai Road nung tesem ana mita ao.

Assam Police-i India Motors aser DD Automobiles mita aodang taila spare parts angu.

Parnoki chichiba Tata Motors parts ta shia osettem ayok.

Iba mapang police-i India Motors nungi Sandeep Jain apu

saka DD Automobiles nungi Dharmendra Kumar Sethi jena orr bushitepdar.

Police-i Tata Motors parts aser MRP stickers aika ngutetogo aser iba dak sendakba nung IPC Act aser Copyright Act kübok arlla balala nung FIR benokogo.

Arunachal Pradesh Congress Committee-i CBI, NIA akhanger

Itanagar, December 19, 2023 (Agencies): Tirap district nung nisungtem tepsetba atema Arunachal Pradesh Congress Committee (APCC)-i bushisüngdang asütsü takhangba agütsüogo.

Taoba Honibarnü taoba MLA Yumsen Matey aser May 21, 2019 nü NPP MLA Tirong Aboh tepsetba Central Bureau of Investigation (CBI) aser National Investigation Agency (NIA) nem bushisüngdang südaksütsüla ta APCC-i ashi.

November 18 nü Longding district nung NSCN (K-YA) telungpurtemi village head Chopku Gangsa aser GB Chijgsan Wangham na pur ao ta APCC spokesman Zirdi Kadu-i ashi.

“State sorkari ketdangsübaren meshitak kümogo aser iba jagi lennirtem taküm kümzüka meyteter aser kümshia nisungtem sen yong pur aoer aser tashiyim agi sen sarur. State nung law & order mali kümogo aser state sorkari 2024 general election atema

candidate ajak nem security agütsütsüla” ta Kadu-i ashi.

“Ozüng alema inyakertem aputsü aser merenshitsü atema inyakyim ka tenzüksüla” ta paisa ashi.

Taoba MLA tepsetba atema Arunachal Pradesh police-i bushisüngdang ka tenzükogo

saka Centre sorkari international order level nung Arunachal nung alirtem kümzüka ayutsüla. Telungpur senzüsönongba noktangtsü atema Indo-Myanmar arrtsülen sepai talila mapa lemsütsütsüla ta APCC spokesman-isa metetdaksü.

Advertisement for Merangkong Senso Mungdang. Includes logo, office address (P.O. Tuli Town - 798618, Dist. Mokokchung - Nagaland), and a list of 3 job openings with details on positions and requirements.



Mopungchuket yim süngküm anasa Aotemulung nungja nungshi lung ka Dec 19 nü Nagaland Legislative Assembly, Speaker, Sharingain Longkumer-i lapoktsüba mapang tangokba noksa nung angur. Mokokchung, 19th December, 2023

Kibong kümer Küm 50 Ajungba Tepela Anogomung



Mr & Mrs. Alemsosang Walling (Khar)
December 20, 2023

"Kechiaser Kibuba tajung lir. Pa temeim taochi aser putu ajak dang pa temulung lemtetba tatem maka." T. Ken 100:5.

Tsüngrem temeim agi ozü temeim tsürabur kibong kümer küm tenem ajungba anogo tajung mongtetsüsa taküm arishi moatsü nung Pa tenüng asanger aser tena nem tenüngsang Tulu agütsür. Ano maneni ozü tsürabur anaprongla nem arishi talang aser anema aliba taküm moajangma ta sarasademtsür.

- Temeim Tanurtem.

Pelaba Lemsateper



Onoki teti meima aliba Asür **Aomatsung Jamir** S/o Akangmar Jamir (Chuchuyimlang village) mapang talangka shiranga arudang aser asüba mapang onok den yariteper ajunga dang ozü temulung taroktiba nungi pelaba lemsateper. Tembar, kinunger, kidanger, arogo, lokti balala, külem tenzüker aser temulunger temi yimya balala nung ozü dang temeim sayuba aser mapa tajung inyakba atema kanga pelar. Ozü mulung zürepa jashia alidang nenoki ajaklen nungi yariba ajanga ozü mulung anisüngzüksüogo. Nenok kija shia dang ozüi pelaba meshitet nung sasar, saka asen Tulusang Tsüngremi nenok ajak molamoshia moatsütsü ozü sarasadem.

Teti onok mulungjang nung lir,

Temeim Kinungtsü, Jabaso, Adianutem, Tsürabur aser Kinungertem

LONGPA BAPTIST AROGO

YISU YIMSÜ AGIZÜKER



AJUNGBA BENJUNG MUNG

Quasquicentennial

28-29 DECEMBER 2023

Northwest China nung menoknok anak; nisung 110 dak tema asü



Beijing, Luchii/December 19 (Agencies): Northwest China kübok kinük nung aliba tenem lima ka nung nüburtem mejanger aliba mapang menoknok anakba sülen nisung 118 süogo aser aika yiruogo.

K e t d a n g s ü r t e m i tekümzükertem telok balala takaratiba nung tenteter yok ajisüaka menoknok ajanga lenmang aser tanga kiojen balala raksatsüba, anentsüh aludaktsüba ajanga parnok mapa tebenjaba kümdaktsü. Iba den külemi tenem lima kanga temekong asüba ajanga t e k ü m z ü k e r t e m inyaksangshitsü asoshi tetsükdaktsü ajurur.

China Tir Xi Jinping-i Mongolbarnü, takokba tashi tekümzükbä maparen benoka inyaktsü atema ayongzüko. Firefighters 1,500 shi yokogo aser ano 1,500 shi nüngdakra yoktsü atema renema lir, ta state media-i metetdaktsü. Ano tekümzükbä maparen balala asoshi officer aser sepai 300 dak tema anidenogo.

State news agency Xinhua-i ashiba agi, menoknok ya 6.2 magnitude tesashi liasü. menoknok yagi Monday aonung 23:59 pm (15:59 GMT) nung Qinghai den arrtsü nung Gansu province anakshija liasü, ta state media sangdong ka ajanga Mongolbarnü metetdaktsü.

Osangbenertem den sensaksemba mapang Gansu

province ketdangsurtemi ashiba agi, Mongolbar anepdang 7:50 tashi nung nisung 105 asüba aser nisung 397 yiruba jangjaogo. Ki-a 4,700 dak tema raksaogo, ta parnokisa shisem. Yimtsüng kar nungbo tzü aser power supply daka kongshio, ta Xinhua-i ashi.

Maneni kidanger Qinghai province kübok Haidong yimti nunga nisung 13 asü aser nisung 182 yirua liasü, ta state broadcaster CCTV-i metetdaktsü.

State television footage ajanga jongdak amshiba garitem rürjeb agi labanger aliba lenmangtem nung oya aliba aser gari tsüngda tekümzükertem jaja aliba sayuogo.

Menoknok agi kongshir aliba tesemtemi tajemtsü tzü, tabentsü sü aser instant noodles tem bener yokogo.

Menoknok anak tenzükbä sülen epicenter anasa aliba nüburtem yimtongi aritepa tugua liasü. Ki karbo ajunga chirepogo.

"Ni 16th floor nung alir aser tremors kanga sashia ajangshia liasü. Menoknok anakba ya tzüsem aruba ama liasü. Ni ozü kinungertem mesor aser floor 16 tashi tetsüng agi aritepa alu," ta Qin-i ashi.


Qin-isa, temperature minus 12 degrees Celsius liasü aser kidanger karbo mangsa dang liasü, ta ashi.

(Maneni tapak 8 nung...)



Rural Youth Nexus Nükshiyim ajanga 15th-16th Dec. Yaongyimsen, Nükshiyim aser Liroyim alir küm 14 sür tsünglang tanurdem saisapong sendong kanga takok tulu nung mongtettogo. Shirnokisa nübo aser rongsen tenla aki yariogo ajak dang pelaba lemsateper ta ketdangsertemi metetdaktäogo.

Mongsen Ait Marok Football Trophy tananübuba asaya osang



Rebels FC aser Salaksalaker na Penalty asayaba mapang Salaksalaker team nungi Rongsenkaba-i goal idaktsüba noksa nung angur.

Dimapur, Luchii/December

19 (TYO): 50buba Mongsen Ait Marok Football Trophy Hombarnü Longjang yimsüing nung tenzükogo. Iba asayamung ya Mongsen Ait Club (MAC)-i ayongzüka asayadar.

Hombarnü asayamung lapokba sentong nung Longden Longkumer, LL Group Managing Director, Nagaland alakteta jaoker liasü.

Mongolbarnü mezüngbuba asaya nung Gilgal club nungi asayar Sentinungsang-i goal asem aser Ayenmongba o Winamthiu nati goal kaka idakja parnoki Salsksalaker team goal 5-1 agi koka liasü.

Tanabuba asaya Omega aser Lumedang na asayaba goal 2-2 agütsür goal kasasa

nung asaya tembang.

Chargers FC puri maneni takok tajung ngua tasembuba asaya nung parnoki Yimsen Youth club goal 8-0 agi ayong ayonga kokogo.

Maneni Rebels FC aser Khanimu Citizens Club na asaya Rebels puri goal 1-0 agi koka liasü.

Mongolbarnü pongububa asaya Gilgal FC aser Lametong na asayaba Gilgal-i goal 10-0 agi kokogo.

Ano asayamung nung 11buba asaya Lomuden aser Aningchen na asayaba Lomuden-i goal 4-0 agi koka liasü.

Mongolbarnü tatembangbuba leg asaya Chargers FC aser Yimsen

Youth Club-A na asaya aser asaya nung Chargers nungi asayar Yangersosang-i goal ka idakja parnoki asaya akok.

Kasa mapang nung mezüngbuba quarter-final asaya Salaksalaker aser Rebels FC na kanga toktepa asayar goal anana nung asaya tembangba sülen penalty metsütepba Salaksalaker-i goal 5-3 agi koka liasü.

Tanabuba quarter-final asaya Gilgal-i goal ka agi Mongsen Ait Club koka liasü.

Bodhbarnü asaya: Lumedan vs Yimsen Youth Club-B

Chargers FC vs Omega.

Iba asayamung akokba team nem senpet sen lakh 1 agütsüsü.

UEFA Champions League round of 16 atema draw süogo

Luchii/December 19, 2023

(Agencies): Hombarnü UEFA headquarters nung UEFA Champions League round of 16 atema draw asüba sülen iba asayamung tesüsabuba koker aliba team, Manchester City pur Danish club Copenhagen den ataogo.

Pep Guardiola-i aniba team ya par telok nung temaba jenjang nung tembang aser parnoki Copenhagen team ya ayong ayonga akoktsü imlar, shirnok Galatasaray aser Manchester United na tsükdaktsür Bayern Munich den külemi qualify süogo.

Draw nung ajak dang jangrademtsü taketbaji Italian champions Napoli aser La Liga champions Barcelona na asayatsü ata aliba ya asütsü.

Ligue 1 champions Paris Saint-Germain pua Spain club Real Sociedad den ataogo, shirnok küm ter tsüingda taküm mezüngbuba Champions League asayadaki.

Kasa mapang nung iba asayamung otsütsüsüsa 14 ben koker aliba Real Madrid team-a Leipzig den asayatsü.

Taoba season UCL runners-up Inter Milan pur Atletico Madrid den ata lir aser England club Arsenal pur Portugal club Porto den ata lir. Kasa mapang

nung Dutch club PSV Eindhoven pur German club Borussia Dortmund den asayatsü.

Maneni Italy club Lazio pur atema iba round melarabo masütsü kechiyong parnok German champions Bayern Munich den ata lir.

Round of 16 nung team tempei linük nungi team tem den masayatsü mesüra group stage nung asayatoker aliba team tem den masayatsü.

Leg ana asayatsü aliba round of 16 nung asayatem ya February 13 nungi tenzüka asayatsü.

UEFA Champions League

Round of 16 Draws:

Porto (Portugal) vs. Arsenal (England)

Napoli (Italy) vs. Barcelona (Spain)

Paris Saint-Germain (France) vs. Real Sociedad (Spain)

Inter Milan (Italy) vs. Atletico Madrid (Spain)

PSV Eindhoven (Netherlands) vs. Borussia Dortmund (Germany)

Lazio (Italy) vs. Bayern Munich (Germany)

Copenhagen (Denmark) vs. Manchester City (England)

Leipzig (Germany) vs. Real Madrid (Spain).

Ref anema nokdakba atema City dang USD 150K senchi achi

Luchii/December 19, 2023

(Agencies): Iba ita English Premier League asaya ka nung Erling Haaland aser tanga asayartemi referee anema nokdakba atema Hombarnü Manchester City dang pound 12,000 senchi chiogo.

Haaland aser par teammate temi ref longbang, kechiyong December 3 nü Etihad Stadium nung Tottenham den goal 3-3 agütsür draw asüba asaya nung asaya tatem goal idaktsütsü asoshi maongka liasü saka match official yagi parnok nem

advantage asayatsü asoshi maongka magütsü.

Mapang apuloktsür asayaba mapang tatalokba dak sendakba nung City-ia parnok asayartemi yimya shitak mebenshiba nangzükogo, ta English Football Association-i ashi.

Referee Simon Hooper-i advantage masayadaktsüba atema asayartem ajak rongnung Haaland mepelaba liasü aser asaya tembangba sülena pai maneni X sabang ajanga iba tatalokba indang video ka dak sendakba nung telangzüba agütsüba mapang

pa mepelaba lemsatepa liasü. Iba inyakyim atema Haaland nem jurila temerenshibo magütsü.

Dejan Kulusevski-i minute 90buba nung equalizer idaktsüba sülen City pur goal idaktsütsü asoshi aritepa asayaba mapang Haaland ya Tottenham defender Emerson-i alangdaktsü. Iba sülen Haaland ya nokdaker asem aser Hooper-i whistle mapui asayatsü asoshi sayuba angu aser Haaland-i Grealish nem ball agütsü, ajisüaka iba sülen Hooper-i foul atema whistle apua liasü.

Northwest China nung menoknok...

(Tapak 7 nungi...)

United States Geological Survey-i menoknok indang magnitude 5.9 liasü ta aser European Mediterranean Seismological Centre (EMSC)-i ashiba agi menoknok magnitude 6.1 liasü.

Menoknok yagi Gansu kübok Jishishan county kanga mejungi kongshia liasü. Gansu nung nütsüing yongsük million 26 shi alir aser iba ya Gobi lisem lima nung shilem ka lir.

Kasa mapang nung Taiwan

tir Tsai Ing-wen-ia asükhu lemsatepogo aser linük ana tsüingda mangatettep adoker liaka teyari agütsütsü mulunga aliba lemsatepogo.

Anüolen aliba Gansu amala province tem nung menoknok ya aiben anoker, kechiyong iba tesem ya Qinghai-Tibetan plateau arrtsü nung lir.

2022 küm September ita 6.6 magnitude menoknok ka agi Sichuan province anokshitsü aser nisung 100 shi

taküm sama liasü.

2008 küma7.9 magnitude tesashi menoknok ka agi Sichuan province kongshi aser iba mapang school nung aliba tanur 5,335 densema nisung 87,000 taküm sama liasü.

Maneni 1976 küm menoknok ka agi Tangshan kanga mejungi kongshi aser iba mapang nisung 242,000 asü, koba China puti otsü nung lendong tesashitiba liasü.

IPL Auction: Mitchell Starc sen tasaktiba agi alizükogo

Luchii/December 19, 2023

(Agencies): Mongolbarnü Indian Premier League (IPL) auction nung Australia nunger pace bowler Mitchell Starc-i otsü tasen ka yanglua pa Kolkata Knight Riders pur sen crore 24.75 agi alizükogo.

Arishi küm 33 tain Starc ya taoba mapang Royal Challengers Bangalore nungi asaya liasü aser küm ti sülen IPL nung asayatsü asoshi meyipa aruogo.

Starc atema bid masü tsüingda Australa captain Pat Cummins ya sen tasaktiba agi alizüker liasü. Pa Sunrisers Hyderabad puri sen crore 20.50 agi alizükogo.

Starc atema Mumbai Indians aser Delhi Capitals natia bit asü aser tatem nung Gujarat Titans pura sen crore 24.75buba nung atsüingnba sülen KKR-i pa alizüka liasü.

Cummins, shiba IPL nung teti dang asaya aruogo, pai Ashes aser ODI World Cup

nung rangloker asayatsü atema 2023 küm masayatsü telemteba agi.

Cummins atema Mumbai Indians, Royal Challengers Bangalore, Chennai Super Kings aser Sunrisers Hyderabad nungeri bid süa liasü.

Taoba küm Punjab Kings puri England nunger asayar Sam Curran sen crore 18.5 agi alizüka pa asayar ajak dang sen tasaktiba agi alizükba asayar liasü, ajisüaka taküm Cummins aser Starc nati pa ajatetogo.

Cummins den külemi Sunrisers puri Australia nungersa Travis Head sen crore 6.80 agi alizükogo.

Sen tasak agi alizükba fast bowler tem rongnung Harshal Patel (Rs 11.75 crore; Punjab Kings), Alzarri Joseph (Rs 11.50 crore; RCB), Umesh Yadav (Rs 5.80 crore; Gujarat Titans) aser Shivam Mavi (Rs 6.40 crore; LSG) nunger densema lir.

BILEMDANGANG

"Peisasa mazüoktetba nisung kati tangar koda azüoktsü."